

四庫全書

集部

欽定四庫全書

張燕公集卷十九

唐 張說 撰

碑文

唐故夏州都督太原王公神道碑

良玉禮神用之西序之器捨之南山之璞同然不有其  
珍也君子安命進之扞城之雄退之去國之老墮然不  
失其正也語夫仗運以行道屬辭以比德亦何代無其

人哉公諱方翼字仲翔太原祁人王周之後也王子以  
敗狄受姓徵君以遯世為名司徒之濟艱難義形漢室  
太尉之圖舉甲心盡魏朝聞蔣濟所言則知尚書志力  
兄弟繼美覽周書所載則見潁川忠烈子姪皆封臣節  
奮揚於百代家聲藉甚於四海大王父司徒定公秉隋  
氏之宗也王父駙馬開府文公裕先朝之懿也考特進  
慎公仁表王室之甥也公門總四岳之靈帝子分五潢  
之氣是生時傑鬱為人紀公雄姿沈毅凜難犯之色虛

懷信厚坦招納之量識略精當達應變之權神守密靜  
堅不奪之節孝友內兆於免懷忠敬外灼於既冠加以  
思叅造化誠合鬼神文其詩書武其韜畧推此才也以  
從政焉求無置矣夙遭家難哀過柴瘁京師號曰孝童  
王母同安長公主引貴遊之誠示作苦之端今太夫人徙  
居郿墅儲無斗粟庇無尺椽公躬率傭保肆勤給養墾  
山出田燎松鬻墨一年而良疇千畝二年而厦屋百間  
三年則日舉壽觴厭珍膳矣處約能久不亦仁乎在困

能亨不亦智乎永徽初始宰安定誅豪暴以育人察姦  
寃以神鬼異政三舉清風一變除滯海都護府司馬以  
母疾辭職為姜恪乘便遂徙朔州尚德府果毅歲餘王  
本立上書理國公之惇老不宜擯抑有詔徵還而親不  
待心與哀絕氣屬禮存詔御醫孟默朝夕診視免喪逾  
年僅堪履立樂成公東討新羅薦為將帥上詔公持節  
鷄林道中總管軍停不行授沙州刺史未至改拜肅州  
以為慢防啟寇非重閉也乃大築雉牒嚴備櫓械人知

有恃戎亦來威儀鳳歲河西盡蝗獨不入境隣郡湊稔  
提絜如雲公傾私泉以資之引激水以立礎舉火百竈  
日舖千人遂有芝草藂生豐年屢降人之詠德刊石存  
焉裴吏部立名波斯實取遮訶偉公為波斯軍副使兼  
安西都護以都護杜懷寶為庭州刺史大城碎葉街郭  
迴互夷夏縱觀莫究端倪三十六蕃承風謁賀自洎汗  
海東肅如也無何詔公為庭州刺史以波斯使領金山  
都護前使杜寶懷更統安西鎮守碎葉朝廷始以鎮不

寧蕃故授公代寶又以求不失鎮復命寶代公夫然有以見諸蕃之心搖矣於是車薄噉首唱寇兵羣蕃響應蝟毛而豎公在磧西捷無虛歲賊車薄於弓月陷咽頰於熱海勦叛徒三千於麾下走烏鶻十萬於域外皆以少覆衆以誠動天葛水暴漲祭徹而三軍涉渡葉河無舟兵叩而七月冰合由是士卒益勇戎狄益懼璽書下問皇靈遠燦遷夏州都督徵詣奉天官熱海之役流矢貫臂陣血染袖事等殷輪帝顧而問之視瘡歎歎曰為國

致身乃吾親也妖賊白鐵余據城平以反奉詔與程務  
挺討擒之善公有發石壞城之計反風焚柵之感封太  
原郡公元珍寇邊受命討擊公以無甲乃發思造六片  
木排袴開鈕解合畫為虎文北至開光與虜合戰若驅  
猛獸蒙臯比莫之敵也胡馬奔駭獲其二啜桑乾舍利  
兩部來降初公善書與魏叔琬相輩公射與趙持滿齊  
名帝每矚之賜比鳴輦賞深懸帳嘗獨行入夜有怪人  
長丈直來趣逼射而仆焉乃朽木也太宗壯之授右千



牛及持滿伏法暴骸公哀而收葬為執金吾奏劾高宗  
義之釋而不罪履道坦坦多如此類適將任帝變龍為  
國方虎天下膏潤羣生雲雨惜哉不辰悄焉邁侮嗣聖  
之際太后臨朝有凶人誣奏公廢后從兄長懷怏怏司  
刑御史侮文矯制不名苛法遷於崖州路至衡州寢疾  
捐館春秋六十有三垂拱三年閏正月十九日葬於咸  
陽原君子曰斯才也斯望也難乎免於斯之代也周公  
聖而謗屈平賢而放賈誼才而謫李廣勞而喪彼天命

之糾紛此人情之惆悵神龍中興以陷酷吏例復官爵  
孝為人極忠為令德神之聽之始枉終直信矣有子故  
光祿少卿璵今秘書監珣皆篤行純孝慎終思遠說少  
也蒙會友昇堂今老矣豈能文旌墓遷司漢籍感激論  
都尉之書邕叙彪情追美樹楊公之碣銘曰

上德惟公氣秀才傑孝弘世美忠廣前烈日月心照江  
河思決難地必通暗機先徹卓犖文藝崢嶸武節歎由  
宰邑借恂臨郡海女避途山蛇可問師律三總軍聲六

振銳氣入營長雲出陣肅將國威烜赫天外玉弩方擊  
雲旗卷旆天道茫茫自古多傷功存西域身棄南荒易  
簣中路懸棺反藏寶刀生衣玉玦無光後有才子先賢  
不忘

河西節度副大使鄯州都督安公碑銘

公諱忠敬字某武威人也軒轅帝孫降居弱水安息王  
子以國為姓世高之達漢紀自河南而適遼東高陽之  
受魏封由陰山而宅涼上高陽王同生尚書左僕射河

間公原晤真河間生建節將軍西平公纘從正西平生  
龍驤將軍黃門侍郎廣宗侯薛晤徽累葉勲華載於魏  
史高祖何藏器廣宗之子也周開府儀同三司寧遠將  
軍肅州刺史張掖郡公曾祖羅方大隋開府儀同三司  
皇朝贈石州刺史貴鄉公祖興貴右武侯大將軍涼州  
刺史徙封榮涼歸三國公考文生不仕涼公皇運經綸  
首平李軌大舉河隍之地遠通城郭之國寵錫蕃庶冠  
絕等夷水出渥洼之文神馬者二千乘山得崆峒之武

朱輪者四十人公有榮盛之門鬱豪爽之氣孝友天至  
清華玉立幼聚童兒必為軍陣之戲長交英俊唯談韜  
略之書始以良家子僕射韋公待價引於帳下安息軍  
建奇績解褐授游擊將軍臨洮府右果毅復以善部統  
御史大夫唐公休璟處之前鋒洪源谷立異效遷右威  
衛翊府右郎將兼新泉軍使進本衛中郎將赤水軍副  
使兼赤水新泉兩軍監牧使改會州刺史營田使換松  
州都督防禦使遷左司禦率兼河西節度副大使臨洮

軍使轉鄯州都督使如故其在軍州傾心下士視人如  
子無約而親附不言而條理其在農牧大田多稼如茨  
如梁思馬斯才有騎有皇輸力四朝歷官三紀名叅禁  
衛身任疆場以靜總繁以逸待寇我無亡鏃之費敵有  
不戰之屈茲所謂一方之干城者也享年六十有六開  
元十四年十一月二十八日寢疾終位知與不知莫不  
隕涕十五年某月葬於烏城之南志公鄉祔先塋也公  
寬以御衆卑以自牧直而無訐廉而無劾朋友不聞臧

否之言家人不見喜愠之色加以心淨三業躬勤八戒  
推是而行何往不濟初甘州有舍利沙禪師道場之四  
果也嘗云檀越德充於內神護於外雖冒鋒鏑永無害  
也及百戰之後啟手歸全西州士人聞之激厲有子仲  
璋李璋如璋全璋重璋庭襲芝蘭喪過藥棘敬奉寔空  
備禮儀於文武撰述家風刻功名於金石詞曰

玉關氣爽金波秋澈涼野蕭條寒山積雪授虛產義精  
勁才傑孝固純深忠惟剛烈負羽從軍奮飛青雲麾幢

按部惠流時雨總軍挾郡入文出武三十年間式遏戎  
虜壇場務靜非公莫鎮金鼓氣雄非公莫震神山與缺  
龍池取駿霹靂陷營衝風入陣勇將知時仁兵善持反  
耕罷戰王者之師牧馬如雲屯庾如坻西軍方壯東首  
長辭振古同嗟沒而不死所謂明德永傳神理鍾鼎題  
門珠玉名子信言豐石令問不已

河州刺史冉府君神道碑

昔者堯舜既没文武將墜天縱孔聖誕敷皇極於是乎



恢六藝而正王道舉十哲而闡微言雍也為德行之目  
求也為政事之首吾見乎龍翰鳳雛百世而共貫虎符  
犀節重世而增華明德之後知其必大公諱寔字茂實  
其先魯國鄒人也古天子有相氏宅于相土實曰冉姓  
蓋氏族之興舊矣不常厥所今為河南人焉五代祖睢  
陽公諱道周尚齊南康公主位平南將軍散騎常侍荆  
州刺史信州都督高祖軫仕梁太子左內率荊州刺史  
齊梁之間荆巫重鎮世善其職江漢宜之大魯父義城

公黎在梁雲麾將軍湖州刺史入周拜驃騎開府儀同  
至隋開皇中為旭州刺史大父黃國莊公諱安昌隋啟  
平城祚之穀壁唐分蜀國瑞以桓珪其後改封於黃授  
信州刺史歷潭州總管贈夔州都督烈考天水郡果公  
諱仁才秩金紫光祿大夫婚皇室漢南縣主經浦澧表  
江陵永九六州刺史偉矣哉承嘉善慶歷代名臣流風  
載於史官勲業藏於王府公果公季子天王自出內稟  
胎教混成之姿外被門風式瞻之訓從容合度造次皆

欽定四庫全書

張燕公集  
卷十九

九

法生而知之孝悌也學而知之禮樂也德義如山文章  
如泉搢紳之士仰焉宗焉弱冠文學生進士擢第遭家  
不造府君捐館五日絕漿三年泣血雖麻葛就禮而樂  
棘加人服闋調并州大都督府參軍事丁太夫人憂過  
哀終喪有如前制應八科舉策問高第授綿州司戶參  
軍轉揚州都督倉曹參軍又舉四科敷言簡帝除益州  
導江縣令鴻漸二鎮翰飛三蜀府中之孫子荆郡內之  
岑公孝用能據淮距海我庾如坻岷山導江入境先歎

加朝散大夫除鄜州長史仍加關內道支度使去青城之  
洞府來白帝之鄜州命服有輝使車何重除婺州司馬  
入謝于武城殿主上以邊庭有事喜問陳湯宣室清言  
思逢賈誼公召對醞藉謀慮深長眷甚前席恩加後命  
因改恒州長史于時四鎮未復二蕃猶梗屯田遶塞戎  
馬生郊代郡藏符臨冀北而誠重漢家張掖比西河而  
還輕乃徙拜涼州都督府長史仍知赤水軍兵馬河西  
諸軍支度使地壯伏龍城雄飛鳥位居刺史總管三邊公

乃利溝洫懋蔗菘序莢積糗糧均轉輸程力役寬御  
悅使授方任能人胥忘其久勞兵不遠其長道雖金方  
氣映雨雪不交之地磧路沙霾草木不植之所莫不盡  
滯穗於坳牧厭甘瓜於戍時朝庭賴之遷使持節河州  
刺史仍營田使崆峒連五郡之壤磧石控九河之源公  
夙奉皇華政聞行路高車未至闔境相歡既見君子溫  
其如玉率性仁愛由衷易簡推是心也物感斯應覩恭  
肅而無競見禮義而興行不言而庶事熙非教而羣下

順故得大田多稼人和歲豐餉軍廩師處勤餘裕計偕  
入朝侍宴於長壽殿上謂公曰河州軍鎮要衝屯田最  
多卿以足食為心朕無西顧之憂侑以彩幣錫以文袞  
及公還州也璽書勞勉王人相繼國家徑流沙梁弱水  
叔西域護南庭連百萬之兵以濟事於外不一日而乏  
者則公之力也無駭入極可謂費旰父勝之杜預平吳  
盖知羊叔子功爾宜登元老作貳天朝止於邊服實孤  
人望享年七十有一證聖元年一月十日寢疾終于

官舍天子悼焉凶費喪歸悉命官給是日河湟耆老山谷羌夷反首羴面號奔州邑雖國亡子產吏哭蔡遵豈云過也愷悌之化人之父母及其歿也衮亦如之信矣太夫人金城郡君隴西李氏江夏王道宗之女也宜此象服爛其盈門嗣先姑之徽音立庶姬之範則薜葉則落藁瘞城隅以證聖二年正月合葬於河南定鼎原禮也天使馬悲啟滕公之室人看鶴舞閉王母之墳松栢接於邱山丘陵對於伊闕石廊將闕華表何年有子曰

祖雍景龍初擢給事中兼侍御史內供奉追惟皇考孝  
於奉親忠於事君恭于立身惠于臨人總是四行旁通  
具美貽厥孫謀以燕翼子故老之口既絕竹帛之文又  
減揚名兮奈何刊石兮來裔其詞曰

倬哉冉氏世有仲弓鐵冠繡服給事於中克昭遺懿樹  
之家風於皇嚴皇高明有融德罔不尊藝何不涉嗣武  
先正思文載協建旗千里逮君六葉龜顧印房虵盤綬  
篋官以勤積業因時峻宰號神明掾稱親信驥足既展



熊軒亦軼邦國海康京師河潤出車西域我君謀之屯  
田比假我君獲之六軍有饋其誰度之一人無憂其誰  
樂之猛獸避德均遷所莅靈鳥所依霸昇執事以今視  
古名齊績類天不慙遺山頽此位隴首迴望秦川斷腸  
吏人攀紵哀鴈隨喪虛靈異野行臨惟堂廟立邊郡魂  
歸故鄉王姬祔葬禮之終也水合蛟龍墳同石馬地積  
霜露烟攢松檟千載九原高碑淚下

贈華州刺史楊君碑

公諱至誠字某弘農華陰人也厥初生人為姬伯之祖  
同邑命氏有楊侯之胤其後東陵奮而開國西漢盛而  
移關門廬隱隱亘連桃塞之上碑闕崑崑蔽滿華山之  
下明德之後士有人焉大王父隋直閣將軍岷蔚撫毫  
道五州刺史邢國公諱貴大父故右衛副率慈汾二州  
刺史靜公諱譽考故常州刺史工部侍郎鴻臚卿金紫  
光祿大夫散騎常侍太子少師贈儀同三司上柱國鄭  
國懿公諱崇敬若夫家聲代業累德積仁故以克隆前

統光啟來葉矣公稟純嘏之粹靈漸軌物之名教端操以正已崇讓以與人勵精以探道善問以毓德學無不達藝無不周成童有傾矚之望既冠為宗匠之表年十三調太常挽郎尋補路王典籤大夫門子執紼橋山王國詞人曳裾睢苑皆一時之選也明慶中詔郡國舉賢良公對策天朝無能出其右者遷太子通事舍人再舉高第徙國子監丞坊監清流才地兼擇東朝東帶銀榜增華西序影纓環林益潤高宗接千歲之統嗣百王之

業封岱岳禪云亭稽于舊章俟茲通博乃除公禮部員外郎祀事克明大典攸序建邦分職得人者昌吏曹居六官之首求郎盡一臺之妙又轉公吏部員外郎準的文昌羽儀丹地丁太夫人憂去職公至行純篤幾於滅性雖杖經外除而柴瘠加等門人記其喪禮天子憂其死孝服畢授幽州三水令曳尚方之舄鳴單父之琴志道不務其大才勤政無陋其小邑美聲流於幽籥惠化匝於周原又應文擅詞場舉策試天下第一敷陳聖謨

啟沃明主究天人之際建皇道之極如有用我者其為  
東周乎朝廷納賈生之言排汲直於外拜公隴州司馬  
未及赴官遘疾卒於長安第春秋若干王祥未施於邦  
政陳寔近終於邑長位不充德其如命何神龍初中宗  
克復丕業格于文祖乃睠從臣緬懷先正以公二子在  
章綬之列追贈公使持節太州諸君事太州刺史非夫  
立言不朽陰德陽報安有藐諸孤而隆家既沒世而榮  
號哉夫人天水趙氏殿中監武權公某之女也受訓公

宮作合君子言容責於國史德行循於法度六姻之內  
宗焉始有輔佐之力卒延門戶之寄初公之捐館也九  
子呱呱哀衰喪位賴夫人實顧寶復日就月將徙宅依  
仁闔門成訓三十年內八子登朝廷交虎綬之華門接  
魚軒之軫某年月日封梁國太夫人景龍二年五月七  
日終於長安之延壽里間者遭家遷播几筵靡托而今  
蒙國昭洗情禮獲申以先天元年十月二十五日合葬  
於少陵原禮也第二第三子夫人在堂而沒長子第八

子在殯而亡今並列於塋非用嘉魂魄長子故兵部郎中徵中子前武衛將軍泚永懷徽烈思勒銘頌郎中昔嘗緒言意感延州之許將軍今復哀託情深舊館之悲高迹難名短詞莫逮採諸故老恭存梗概其詞曰

昂昂楊君秉心泉懿大河靈岳含光毓粹學妙研精文道逸思行為時範言為故事存蘊令德沒揚虛位善慶克家哀榮乃備嗣姑稱姒敬妻曰冀復有母儀千載一致貞墳土隴同封此地芳烈攸哉金生碑字

贈廣州大都督馮府君神道碑

夫積德垂裕之謂仁追遠揚名之謂孝仁則愛鍾厥後  
孝則榮及其親嘗三復於斯言今於馮君而見之矣府  
君諱君衝其先長樂人也釋趙歸秦本家上黨分燕徙  
越又據高良自遠祖榮懷化侯業以至於大父贈荊州  
都督益先考高州使君智幾咸以勲績建旗本郡甲兵  
雄於一方政化沓於千里君蘊含弘光大之德守冲默  
安貞之志秉難進易退之操詣希聲若納之道為而不



有故物譽難得而稱靜以居常故世榮無由而及以聖  
歷之歲終於本城子幼家艱喪禮蓋闕夫人麥氏備母  
師之六行履先始之四德處順思柔以成婦道及衛亡  
共伯而魯重敬姜誓以汎舟之詩遵其闔門之禮季子  
今冠軍大將軍右監門衛大將軍上柱國渤海郡開國  
公力士始自齟齬來儀上京既違徙宅之歡爰從倍年  
之訓感三州之深義易百代之因生捨馮亭之本枝從  
高僊之令族千秋仕漢遂去田宗隨會在秦別為劉氏

遇風雲之感會承日月之光輝第土荅其勲庸貂璫寵  
其忠信太夫人踰越嶺嶠就養高堂孝子展白華之勤  
慈母欣綵衣之貴精神所感振古難儔噫歟資孝為忠  
隱心後動引桑萱之深誠慕金張之周密敬以衛主愛  
以安親而善不彰惠不遂者未之有也由斯言之則哀  
樂存乎心不以至音改禍福惟所召不以偏覆及詩云  
魯侯燕喜令妻壽母明神勞善人而壽其母也夫人以  
開元十七年享年八十有七五月十二日壽終於京兆

之來庭里舍天子悼先賢之晦德嘉侍臣之克孝思賙  
襁之未崇創窀穸之將及於是詔贈先府君潘州刺史  
備禮飾終招魂合葬是歲也大享宗廟偏謁園陵錫類  
之恩施於鄉士重贈府君使持節都督廣韶循康等一  
十六州諸軍事廣州大都督夫人受邑舊邦啟號南海  
從夫加贈改封越國夫人哀榮備於始終寵光合於中  
外為子之道何以加焉於是與兄左衛中候元璉左領  
軍衛郎將元珪等惟舊業之難名感新恩之薦及思建

碑表以永芬芳夫毓至德以庇後嗣仁之厚者也揚令名以崇祖考孝之大者也仁為五常之先孝實百行之首貫經教而莫比標人倫而獨出宜其鏤美金石式旌墳隧無忘清徽昭示來葉何必會稽江上獨有記孝之碑安陵廟前空傳尚德之頌其詞曰

明珠紫貝產於南國代所珍兮允兮君子不耀其德克全真兮慶流我後高驥迴翥中貴臣兮朱幡象服寵及泉路榮其親兮孝道不墮勒銘表墓留芳塵兮

贈涼州都督上柱國太原郡開國公郭君碑奉

勅撰

四時平分清秋之氣勁五方異俗崆峒之人武故隴上  
多豪山西出將其有雲龍感召星象特生金鼓登壇隱  
如敵國麾幢指塞自比長城得之於太原公矣公諱知  
運字逢時其先太原著姓今則晉昌人也本乎文王之  
弟是為虢叔虢或云郭因而氏焉自燕昭尊魏以築宮  
漢祖封亭以列國其侯于陽曲宅彼太原舊矣亭之玄

孫友從太原徙隴西昭帝分隴西置西平郭氏又為郡  
之右族友之昆孫武威太守憲憲之猶子散騎常侍芝  
俱有名跡見於魏晉則晉昌諸宗散騎之後也爾乃一  
門連譽時人號曰三儒四海齊名天下謂之八顧光祿  
派分於馮翊廷尉世茂於潁川孝則天錫釜金忠則帝  
章冕服仁則猛獸不害信則童兒不欺豈直介休見有  
道之碑洛陽聞立德之傳而已曾祖欽瓜州大黃府統  
軍上柱國祖才朝議郎瓜州常樂縣令上柱國父師朝

散大夫上柱國贈伊州刺史磧鹵之地戎馬生郊業戰  
鬪而弘勲仕州縣而為達啟莫京之繇福不在於其身  
積無聲之善慶必流於後嗣公太白之精雷泉之靈膺  
家之禎為國而生身長七尺力能扛鼎猿臂虎口虬鬚  
鶚麟射穿七札劔敵萬人子卿路逢遙識將軍之相唐  
舉一見足辨封侯之國解褐以善戰授昭武校尉秦州  
三度府左果毅以敗敵北庭加游擊將軍沙州龍勒府  
折衝兼右金吾郎將瀚海軍副使以軍界破虜即授其

州刺史進當軍經略使朝廷以未愜前除且有後命遷  
本衛中郎將仍舊為州軍使默啜之寇北庭也公奔命  
解圍軍聲大振加雲麾將右武衛將軍封介休縣開國  
公食邑二千戶開元二年吐蕃入隴右掠坳牧公兵以  
奇勝寇不復蹤積甲山齊而有餘收馬谷量而未盡歸  
功未筭朝儀多之拜右羽林將軍持節隴右諸州節度  
大使兼鄯州都督河源軍使鎮西陲信國之藩屏坐北  
落亦王之爪牙故入奉期門而出分閫寄於是料敵無



備間其師老潛軍一舉大俘九曲鎖甲文劍犍馬犛牛  
既獻戎捷遂頒朝賜乃兼鴻臚卿攝御史中丞封太原  
郡開國公加前食邑三千戶執憲總軍典屬乘障增爵  
益邑遇厚恩深俄而六州郡胡相率大叛命公統隴右  
之騎濟河曲之師鋒鏑爭先玉石俱碎拜右武衛大將  
軍授一子官金銀器百事雜綵千段班師臨洮遘茲虐  
疾嗟乎匈奴未滅宿志不伸生也有涯死而猶視開元  
九年十月二十二日薨於軍舍春秋五十有五蕃夷邊

鎮血面摧心悲慘風雲號慟山谷豈非良將視人如子  
人亦視猶父乎皇帝閱焉詔贈涼州都督米粟五百石  
錦帛五百段命都水使者張景佚備物護葬遵朝典也  
惟公氣猛而性和量寬而精銳沉謀可以掩著蔡雄斷  
可以奪鬼神故常糟粕韜鈴芻狗風角然其樹恩結信  
立威用武烜赫如風濤震盪如雷雨戰必克攻必取每  
有奏謁帝特稱歎孝文之得魏尚虜不足憂太祖之見  
郭嘉知成我事前後錫錦衣寶帶文馬素女爛其盈門

長鳴在廐感知已之主陳必死之力皇情西顧則九羌  
鬷鼓詔書北伐則六狄焚旗上成聖君之玄鑒下效武  
臣之素節其竟也如此夫為人子立廟致敬祖考來格  
不亦孝乎為人臣恢疆禦侮以勞定國不亦忠乎若然  
者歸義方於先人揚令名於後代可也嗣子英傑起復  
定遠將軍左領軍衛翊府中郎將假紫服金章河西節  
度副大使英奇朝散大夫前尚輦奉御英協游擊將軍  
前京兆府勵行府右果毅都尉英彥朝議郎前左衛胄

曹叅將等或善居喪而過哀或從王事而奪禮則知辛  
賢父子繼位將軍祭彤兄弟並叅師律去本不戀達也  
而新是謀權也嘉此武功創其宅兆以十年七月葬於  
太原夫人燉煌索氏祔焉禮也皇上念功以惜逝厚終  
以遇存有詔詞人為其碑志介士送葬即封征虜之墳  
單于入朝當祭度遼之墓銘曰

觥觥將軍雄冠羣平西征北震戎壘獠亭障卧鼓屯  
田饋軍仗此白刃致彼青雲郭侯宴喜既多受祉玄牡

黻衣清廟蠲祀鼎食金奏炮鼉膾鯉既來不庭有嚴天子流沙博望羽林飛騎河曲迴兵臨洮舊防手握金節魂沉玉帳千里送喪三軍悽愴詔喪禮崇恩碑義豐生為神將死為鬼雄身世一滅榮華萬空祁連之墓長旌武功

右羽林大將軍王公神道碑奉勅撰

維大唐開元十五年閏九月二十三日庚申右羽林大將軍持節河西隴右兩道節度使營田九姓轉運十副

大使兼赤水大使專知節度事攝御史中丞判涼州都督上柱國晉昌伯堯於鞏芑亭故也夫事君效命之謂忠殺敵榮親之謂勇干星襲月之謂氣逐日拔山之謂力有一於此名猶蓋世矧兼其四何間焉是晉昌所以錯落將星崢嶸山嶽者也公諱君奐字威明瓜州常樂人也父壽因公建績致位九卿臨難守死褒贈特進審塞翁之倚伏達矇眊之浮休老而益壯沒而立名者矣公威聲發於雷泉武毅標於峒嶺小頭銳上猿臂虬鬚

龍劔摧百勝之鋒蛇矛得萬人之數拔自行陣果有呂蒙之才拜於壇場不爽韓信之用始仕鎮戍歷班外府將及郎將中郎至軍副率雖驟移官守而恒在疆場郭知運推轂河源握符隴右公未登一命事主將之旌麾不出十歲代總戎之節鉞慷慨之士以為美談於是自驍衛將軍遷羽林大將軍既督隴右兼統河曲綰塞垣之十軍佩節制之兩印大田多稼而屯廩百億蒐乘籍馬而鐵騎數萬迺臨赤山焚罽幕獵清島驅犛牛喑鳴

則七戒辟易烜赫則千里震動亭候恃其長城廟堂賴  
其神將月獻戎捷歲行軍賞王侯無種屠狗起於將軍  
戰伐有功爛羊超於都尉前後翻飛幕下奮躍行間跨  
軍典郡腰金冠玉者數十百人矣每至入朝奏謁升殿  
論邊山川險易立成於聚米攻守方畧一決於前籌遙  
詔置兵先合漠光之旨新書從事暗同魏武之心故得  
延譽上騰風雲鬱其氣色恩榮下達日月供其輝光當  
斯時也躊躇攘袂三垂可以氣壓百蠻可以力制卽緒



者老生之常談和親者豎儒之怯計安足為神武非常  
之主道哉誓請先拔犬戎次繫獯鬻盡區域於西海闢  
郡縣於北荒輝皇靈於天外圖壯節於雲閣其事如果  
曠古未儔惟君知臣保斯言之可復何神與善負厥心  
而無成是年秋八月吐蕃犯邊瓜州失守盜憎吾將執  
致其親公以為背父立威非孝也頓兵從敵非忠也大  
義逼其忘家方寸亂其供國其定計也成列而出討賊  
盡狄而退殺身忠在孝先將之道也公馳驛要諜而回

紇內叛以八九之從人當數百之強虜然猶虺噉擊射  
殺傷畧半亭孤兵盡流矢橫及所謂作而餘威折而不  
撓矣嗟乎嘗膽之憤空結噉肝之怨莫讎天子聞之黯  
然興嘆人言以命許國夫豈忘其言哉苟收必死之忠  
焉問不虞之過茲蓋聖主推仁恕於天下懸大信於後  
世愛欲其生懲晉侯再克之喜惡傷其沒抱秦伯猶用  
之誠婉獨見之端豈常情所逮謀臣飲恩於望表猛將  
感德於事外然後任人之固衆可知也乃下詔追贈荆

州大都督禮命寔宥加常二等死事之經也公之伉儷  
曰武威郡夫人夏氏韓母築城之智孟光舉臼之材拔  
棘解圍三軍攝其健婦崩城慟哭四海傷其孝妻此又  
間代之一竒一家之兩絕者也嗣子尚衣奉御承榮天  
獎賜蘭星祥名寶禮義形於橋梓哀戚過於縗麻稟訓  
帷堂克持門戶特奉恩旨收其二蔭飾柩玉闕歸魂上  
國以十六年十月詔葬於萬年縣見子之原鹵薄齋列  
方相雙引京尹護喪史官頌石千乘送葬觀驃騎之威

儀十里開瑩識龍驤之丘墓銘曰

合衆在仁正兵維義將為天目國命所寄曲乃老師輕  
實兒戲安我封略才難不易赴赴將軍貌貅絕羣超騰  
白地騫翥青雲朝盛勇爵家榮戰勲衆聲飛譽帝曰予  
聞予聞伊何甲兵繕肅屯積萬庾馬量百谷甘心犬戎  
指掌獺鷺大畢當趾單于可掬壯計先達王師未張城  
隳孤塞寇及高堂忠先孝後拒敵而亡外仇易復內變  
難防克日將戰呼天不假岑彭詐客張飛帳下流鏑何

人交錢去馬蒼黃反覆哀哉命也美殮姑臧寵歸芷陽  
東都門外南登路傍高墳累累列樹行行父子同兆何  
殊故鄉詔刻金石義形意氣隱善必書殤魂不諱事弃  
忠在生輕節貴嗟爾明靈銜恩永慰

撥川郡王碑奉勅撰

珠玉無遠而登輦輅之飾寶也松栝無幽而入殿堂之  
構才也物貴其用人亦如之撥川王論弓仁者源出於  
疋末城吐蕃贊普之王族也曾祖贊祖尊父陵代相蕃

國號為東贊戎言謂宰曰論因而氏焉公有由余之深  
識日碑之先見陋偏荒之韋毳慕上國之衣冠聖歷二  
年以所統吐渾七千帳歸於我是歲吐蕃大下公勒兵  
境上縱謀招之其吐渾以論家世恩又曰仁人東矣從  
之者七千朝嘉大勲授左玉鈐衛將軍封酒泉郡開國  
公食邑二千戶周語曰犬戎樹敦守終純固今其俗獷  
而輕死其法折而不撓故前代無降人中土無僮僕自  
公拔身向化首變華風澤潞之間始見戎州矣若夫河

南胡苑坳牧所利每歲水合虜騎是虞中軍必謀于元  
老亞將固選於時傑神龍三年以為朔方軍前鋒遊奕  
使景龍二年換左驍騎將軍開元五年兼歸德州都督  
府皆如故八年遷本衛大將軍改朔方節度副大使公  
之理兵也堅三草利五刃偶拳勇齊足力信賞罰分甘  
苦六轡如手千夫一心接獠獫猶蚊蚋卧沙塞如衽席  
薦居露食垂二十年雨畢而成師冰泮而休卒寒氣入  
於飢骨夜霜出於鬚鬢人不堪其勤公不改其節韓公

之建三城也公洗兵諾真之水刷馬草心之山以為外  
岸而版徒安堵鄭卿之和默啜也公授館李陵之臺致  
饗光祿之塞以為內侯而賓至如歸九姓之亂單于也  
公四月度磧過白檉林収火拔部帳納多真種落彌川  
滿野懷惠忘亡漢南諸軍避其計也降戶之叛河曲也  
公千騎奮擊萬虜奔走戡翦略定師旅方旋而延陲跌  
復相嘯聚上軍敗於青剛嶺元帥沒於赤柳澗公越自  
新堡奔命寇場羸糧之徒不滿五百兇醜四合衆寡萬



倍公殺牛為壘敗寇為餉決命再宿衝潰重圍連兵躡踵千里轉戰合薛訥於河外反知運於寇手朔方諸軍壯其戰矣斫摩之奔也邀於黑山口覆其精銳市惠之背也追至紅桃帳掩其輜重乳泊之會刺蘭池之狂胡木盤之役縲方渠之逋寇凡前後大戰數十小戰數百算無遺策兵有全勝是以六狄逃遁三垂又寧聲暴露於天下業光華於代載信皇威之所加亦武臣之力也故錦衣寶玉允荅戎功甲第良田丕承錫命語其智效

未甚優寵黃頭黑齒比價齊名積戰多瘡累勞生疹恩  
命尚樂馳往診之晉豎以深秦醫無及十一年四月五  
日薨於位享年六十制贈為撥川王稱故國志其本也  
太常議謚曰忠由舊典昭其德也長子盧襲官封繼事  
業次子騫久特拜郎將十二年四月詔葬於京城之南  
懷遠人也大路鼓吹介士龍旆虎帳貔裘封犛殉馬吉  
凶之儀舉夷夏之物備長安令總徒以護事鴻臚卿序  
賓以觀禮哀榮之道極矣君臣之義厚矣有命國史立

碑表墓吾嘗同寮敢昧遺烈銘曰

黃河接天青海殊壤舉世安俗拔俗誰放倬哉論侯利  
有攸徃奮發橫絕搏空直上以衆歎塞因敵立勲吐蕃  
萬戶今嘯成羣精感天地氣合風雲既合酒泉乃位將  
軍朔方陰塞直彼獯虜帝命先鋒闢如虓虎山北加電  
漢南擊鼓十數年間耀國威武我有師旅將軍鞠之我  
有邊氓將軍育之柳澗亡師一劍復之蘭池叛胡三戰  
復之武節方壯朝露不待王爵送終宿恩未改時來世

去人物如在銘勲謚忠以告四海

唐故高內侍碑

孝足動天義堪變地河中見三州之姓炳彼精誠南亭  
聞再逢之母彰茲奇事不有陰德曠代誰鄰內侍高延  
福者將軍力士之慈父也粵自西雲干呂東明銜璧  
以亡王之族處巷伯之官而將軍本繫馮亭代家南越  
未知父母來奉宮闈老而無子曰悲幼而失親曰苦調  
之悲者笙磬異器而同音貌之苦者秦胡別狀而共色

從此斷金合要投漆相受承順莫違日嚴生乎本性仁  
慈匪飾天屬由乎自我父子之名既定姓氏之目因移  
大將軍之家去鄭而取衛平原侯之室變郭而從甄亦  
猶是也既而內侍以鴻漸登朝苒蒨朱紱將軍以龍樓  
得主豔耀金章其訓子也溫室之樹無言車中之馬數  
對其事親也三牲有養志之樂百行無匪疾之憂至矣  
哉高氏之子也以思親之願而展親以欲報之誠而報  
德神明翕而哀懇荒裔疎而慕義乃有傍求聖善提挈

炎洲二紀積離萬里遙至音容莫識涕淚茫然驗七星  
於子心認雙環於母臂而後深傷頓感若墜谷而登天  
蘊怨都除類愈矇而覩日於是盡歡二媪兼敬三人均  
養之恩咸不寐於十起反哺之志齊色難於一堂羣公  
賀虞潭之親天子嘆馮勤之母此復然矣內侍事主四  
朝歷官七政專良恭肅著無綸言冲謙儉讓得名朝列  
年六十有四開元十二年終於來庭里明年某月葬於  
長樂原繼子力士喪孺慕而加等葬罄誠而備物義方

之經鬱為稱首孝德之傳今見其人永維先恩追綴餘烈若夫慈羈旅之稚童仁也約詩書之尊教義也貴不居而要避權禮也生推心而死有托信也仁為德本義為行先禮為身宅信為意田故仁之報也壽義之報也樂禮之報也安信之報也順履順居安乘樂享壽此四者生人之偉事自天之深致者矣於戲領賜冠馳寵勢偃塞俗上煜爚君傍者豈不思景行高山慎視前轍如或少選亡禮顛沛違仁瞻言四報咫尺千里揚芳樹淑其

不難乎予固春秋之徒也懲不濫而勸不僭義重天綱  
孝崇人紀樂諄諄之成訓善哀哀之父母不著倚相之  
書將受丘明之恥九原上千月深覽碑版傷知音有以  
見古史之心也銘曰

高堂樂未散重壤哀已擗寶帳吹靈衣金尊照塵席苦  
長夜之易泯怨寸景之難惜刻義聲興孝心萬古千齡  
得此名

大周故宣威將軍楊君碑



公諱令一字令一太州仙掌人也隋司徒觀王之玄孫  
周孝明高后之歸孫今司衛卿之元子維有隋接三統  
建萬國我高祖以同姓為王維皇周敦九族叙百官我  
諸楊以外戚而貴公體玄黃之純粹承河山之丕緒孝  
乎內炳忠焉外均性與天和道合仁愛叔恤孤老分產  
踈屬汰於周施約於妻子加以樂善而好樂降尊而容  
衆能辨樂和思柔酒德容止可度溫溫如也文章可觀  
彬彬如也淵英皎穆當世碩士與之游焉而曰君子若

夫漢魏舅族有恩澤之封公卿門子有良家之侍公浮  
雲世祿匪石儒風究乎王道之綱紀明乎人事之終始  
年十九舉進士高第授潞州叅軍轉千牛胄曹遷洛陽  
尉從班次也居無何拜朝散大夫行通事舍人俄而加  
太中大夫檢校天官負外郎夫行人之在周禮方國是  
接公修其令政帝曰余嘉郎官之著漢儀列星是應公  
司其典故時稱邦則國家左賢右戚一文一武以公地  
望羽儀寄深虎旅除宣威將軍行右衛翊府郎將僂俛

從事非其好也初公時為郎也遼戎悖逆作患幽冀皇上煥休下人故我有神兵之役選達權靡監之吏佐猛毅維城之師乃下制以公為兵曹焉實有密贊軍政獨飛長策豈云卒乘輯睦戎機式序若此而既哉俾雷霆颺動剿慝殿邦威玄兔懷黃龍馬未汗而敵盡人未疲而兵輯者公與有力也及班師振旅冊勲踰時帝用咨有司之違古念有功之未祿將遷德命需多勤有日矣方當翼大化增三光之明熙天秩垂九德之聲昊天不

惠厲氣流行如何斯人胡不眉壽年四十一聖歷元年  
夏六月辛丑遘疾而卒嗚呼哀哉梁木未施予道不究  
呱呱稚嗣仰號蒼穹哀哀嚴親惴臨淵谷遐邇察舊暨  
乎欽風未識之徒罔不盡朋悲而輩歎矣天子憫然吊  
之以玉冊賙之以錦衾羣公傷然誄德於素旆圖像於  
青史粵乙卯假葬於合宮縣平樂鄉之北阜郭門十里  
印山西岡巒萬古之阡都邑九原之地隧寄新隴魂懷  
故域藐視諸孤未遑歸葬平生志事孰已焉哉厥弟五人

比才連譽曰踐一獻一循一惟一尚一等因心則友世  
稱萬石之閨門死喪之戚吾見伯淮之兄弟僉曰我圖  
後事日月除乎哉乃布哀友生託詞懷舊跡德表墓垂  
之來昆其銘曰

洪河南注少華西峙氤氳靈會生此君子生此君子維  
國之紀宣慈惠和禮樂文史敦錫崇類汲揚媿否勤然  
濟物若不由已克明從訓誕敷厥美修詞北闕潤色東  
里揮翰文昌列星順啓交戰禁衛為王爪士允文允武

翁歸是比疇曰禦寇諗軍北鄙攘狄黃龍濟師蒼兕將  
王玄默繫公是恃帝懿乃勲將圖膺仕仇仇執憲不我  
力以役役大勞未授多祉景命無祿洪基中地父兮葆  
鬢孤兮稚齒孔懷靡及凡伯瘁止陟彼却山丘墟歲磧  
荒草無際羣哀所起吁嗟楊侯託居此矣沕滴綿曼德  
音曷已久客思鄉永懷桑梓

唐元城府左果毅贈郎將葛公碑

公諱威德字某曰葛氏京兆涇陽人也其先嬴姓咎繇

之後夏有葛伯氏族興焉寧陵之傍尚傳侯國綏山之  
下獨有仙祠嬰則威服五城襲則績稱二縣鴻臚秀於  
吳會散騎崇於晉景在其子孫是宜繁羨公生而開朗  
長而英拔非因馬鄭之學勤合禮經不待孫吳之書暗  
同兵法有拳勇尚氣概顧盼稜華風神都爽五馭善於  
東野六射勁於西霜少以嫖姚之才入充供奉之選御  
橋驂駕犯清蹕而不驚輦道啼烏應鳴弓而自落更番  
左右星歲重深賜上柱國拜元城府左果毅天下大定


李廣之用無施雲中薦賢馮唐之言已老春秋六十五  
神功二年某月終於洛師藁殯却阜夫人太原郡王氏  
夫人郭氏實生大將軍福順一見聖主再紐乾綱重位  
冠乎北軍茂功藏乎南史故象服臨祭魚軒以朝天子  
深嘉歎馮勤之母羣公列拜賀虞潭之親享年七十五  
薨於京兆之三真里公愛敬奉親軌則移於後代義方  
訓子福慶來於先人葬有日矣乃下制曰禮著飾終情  
惟悼徃詢諸前烈抑有舊章前左羽林大將軍葛福順



父某守其謙素弘此藝能未展才術奄從凋殞而嗣子克家式昭勲業既念功以追遠亦自葉而流根宜申獎贈俾慰泉壤可贈游擊將軍守右驍衛翊府郎將開元九年二月九日葬我郎將君前夫人王氏後夫人郭氏祔焉禮也章帝以綬輅旗在列廟食備其牲牢法葬陳其簫鼓孝慈之道著矣哀樂之禮畢矣尋彼平生之事忽如絕光繫乎碑版之文永存遺烈銘曰

硜硜都尉角立傑豎神銃玉劍氣雄金鼓六藝爰設射

馭為武百行雖名忠信為主時不兼命位不充才善流  
慶峇身謝榮來大原棣棣寓惟嘉偶羽林桓桓克大其  
後



張燕公集卷十九

欽定四庫全書

集部

張燕公集卷

二十一

詳校官侍郎臣謝墉

檢討臣何思鈞覆勘

總校官編修臣王燕緒

校對官主事臣陳墉

謄錄監生臣許溶

欽定四庫全書

張燕公集卷二十

唐  
張說撰

碑文

唐故廣州都督甄公碑

君諱亶字道一中山無極人昔胡公紹舜奄有大邦楚  
子縣陳逃威樂土當烈王之王也有陳通奔周王以為  
忠將美其族言舜居陶甄之職命為甄氏錫姓因生如

堅之讀形聲轉注以真為音處則稱劉明歸晉者以異  
變而為郭蓋承毓者有馮通之裔邯仕漢為太保大司  
馬承陽侯邯十六代而生鸞仕齊太山太守司隸校尉  
無極縣伯撰笑道論行於代鸞生隋汾州刺史族族生  
隋沁州刺史紹紹生隋市令協協生單于大都護府錄  
事參軍贈宋州刺史封惟祖惟曾在商在夏世濟其美  
永觀厥成君即宋州府君之第四子也博綜經史脫略  
流俗情之所遺對咫尺于千里氣之所重輕百金於一

諾曰興曰比階應劉之閭與或草或真藏鍾張之筋骨  
譽滿鄉曲聲聞闕庭天后臨朝再加辭命皆辭以親老  
不赴逮疾草易簣骨立廬墓復有制徵焉刺史獨孤楚  
率府寮敦喻起於墳左乃授左金吾中侯生盡其養豈  
違親許人沒盡其哀方委身殉國或用或捨有以見大  
君之仁時止時行有以觀大孝之節君臣之際其遠矣  
哉尋除左千牛長史檢校武始軍長史攝右臺侍御史  
兼靈武道行軍長史攝右屯衛郎將副臨洮軍使轉右

驍衛右郎將為臨洮大使拜蘭州刺史兼榆林臨洮等  
軍大使除夏州都督兼鹽州防禦使徵授幽州都督衣  
之以紫攝御史中丞為河北軍州節度大使君政成周  
月惠則在人患是緩風表以去職未幾復除夏州都督  
屬山戎矯虔倣擾王畧兵落天上思迴行以出奇虜墮  
計中守便宜而未進時以為逗遛貶撫州刺史朝廷明  
此舉也未到官遷廣州都督兼嶺南按察五府經畧討  
擊使春秋五十有七開元五年七月二十八日終于官



舍以年月日歸葬於恒陽之王公山南原不忘本也君  
三承辟命再攝憲曹八興戎旅五司藩翰事之去就所  
歸必執其中職之高卑為政各當其選觀夫果於事喻  
於義下學而上達強立而知類畏尅厥愛道無常師有  
商也之文有求也之藝習禮必本飾之以精華積行必  
崇茂之以枝葉以此探賾則投刃皆虛矣以此效官則  
操刀必割矣是故羣士之所執掌而君之所綽約常情  
之所戚戚而君之所蕩蕩由是言之槍榆之與海運鳴

琴之與星入從可知也惜其志懷慷慨雅多大略援桴  
作氣有七縱之能孤劍無前當萬人之敵竟不得橫絕  
漠騁雄筭刮狼望之侵鏡乎太清卷瀚海之波靜而可  
掃駸駸之足受羈騏驥之途堂堂之貌不畫麒麟之閣  
彼哉彼哉有遺恨矣其孤某等望兮不至求兮不得永  
懷揚名庶慰罔極銘曰

有鰥在下陶復河濱元女作合相攸于陳楚為不道祚  
以永淪周寵忠節氏以初因丕惟承陽致君論道施及

無極建家載考彼汾彼沁伊時之寶宰兮牧兮亦孔之  
好積慶潛演後人挺生標格磊落氣志清明八司戎事  
厥謀有成五刺方伯厥政有聲山有杞梓工思其度國  
有孫吳君思其略弃德珠浦遺氛沙漠惜哉不當今也  
可作恒岳臨北滹沱注東仁不忘本孝亦令終壽堂盤  
薄牧子克窮勒美松隧穆如清風

唐故豫州刺史魏君碑

公諱叔瑜字思瑾曰魏氏鉅鹿曲陽人也考太師鄭文

貞公致君皇極配神清廟故祖德胄系叙於太宗之先  
碑矣公生育慶緒天然炳胎教之資少長德門日用成  
躬率之化性盤於孝友習狃於禮樂俛仰中則從容蹈  
道加以專精好古旁通多藝聖人之所志聞一反三君  
子之所能舉一而九與同生璘琬知名當代始以門資  
補左千牛轉洛州司兵司議郎職方郎中太子洗馬出  
為懷州長史歷慶慈儀豫四州刺史春華韡於兩宮時  
雨零於四郡觀風之使所在聲聞變雅之化到今遺詠

其年春秋五十有一終于豫州葬於舊城夫人太原王氏祔焉禮也議者以公不避強禦有昭子之政事不為皎厲有康子之隱德虛已尚賢有文侯之樂善重諾分急有信陵之高義人鮮有一況兼四乎公賦入封君妹歸帝子車馬無戚里之盛衣服有儒者之節儉而得禮富而無驕此蓋奉先之素履也公善於草隸妙絕時人以筆意傳次于華及甥河東薛稷世稱前有虞褚後有薛魏此又貽訓之餘美也嗟夫嗟夫公學埒向歆操齊固

變若天假三壽朝登六事則鄭之桓武可尋漢之韋平  
一揆而年近知命位止方州落鵬翼於半霄負天之力  
莫展頓龍媒於局路追風之勢斯畢九原不作誰將與  
歸二子獻華追存先德俾予作頌以慰罔極曰

昂昂豫州毓粹含道欽若古訓思文烈考於穆烈考維  
國之師公承丕構思皇纘之發軔臺閣風流榮問建麾  
千里澤霽四郡位未充德命不遂才彼蒼孤善謂之何  
哉子孫必復丘封永久穆如清風振芳厥後

唐西臺舍人贈泗州刺史徐府君碑

叙曰經天地揭日月文之義也掌邦籍出王命位之崇也本乎言行君子之樞機成乎易簡賢人之德業則徐公其人也昔公奮明哲之姿當高宗之盛天保大定俊乂用章而光耀天臺雲飛綸閣文敏以暢機務稽古以析嫌疑禮樂政刑擇三代之令典典謨訓誥有唐虞之遺風較然於庶績者可得而聞也其嘉猷讜言沃心造膝滋液內潤精微外密混成於元象者不可得而聞也

公諱聃字將道姓徐氏東海郡人也遠祖偃王基仁義於上代嚴考孝德濟弘美於近世公始以弘文生通五經大義發跡曹王府叅軍右千牛進潞王府文學崇文館學士兼侍王太子講又芳林門修書于時中朝碩老下國英俊皆忘年請交不遠來謁望其路者若晨風之赴北林得其門者如衆山之仰東岱公不樂趨競雅尚退謚深以椒房之家聲名太甚求為外職出宰桃林未下車勅改沛王掾終歲選擬司績員外司議郎並不就



乞補雲陽令到官累日詔除司城員外郎乃選西臺舍  
人其為政也如始云爾初公幼而殊異八歲工文太宗  
聞其聰明召試詞賦錫以佩刀金鞞稱曰神童及中年  
高宗嘉乃道優悉命皇子受業訐謨帝采許以國鈞故  
公備更路沛豫諸王侍讀上之在周邸公嘗來誨詩焉  
夫然集虎觀之書承龍樓之問二宗之代矯首辭林四  
王之門從容經席非有海山之藝溫良之德儀形以孚  
柔嘉維則其孰能發揮聖智啟迪天人者乎咸亨元年

出為蘄州司馬二年坐事徙于欽州君子大守道而小  
守位污隆隨時屈伸以義亡令尹而不愠失司寇而遂  
行蕙蘭敗不為不芳日月蝕不為不明古務忠信何陋  
蠻越優游欽江歲餘而沒春秋四十有三惜乎不登宰  
衡以平天下天天是椽命也歟既而慶隆嗣子返公孫  
之樞德施後王拜先師之爵上元三年某月歸葬於少  
陵原中興神龍元年賜泗州刺史褒賢追遠念道尊師  
聖人之禮也議者以公考果州府君高學才華香名省

聞武帝賢妃姊也大帝婕妤妹也公既高步掖垣子又  
踐修舊職同生標藻於鸞殿重世含章於鳳池自班姬  
父兄文雄漢室左思女弟詞蔚晉宮悠哉二族徐氏三  
矣才難不其然乎凡是好文之君賞音之士公之逝也  
豈不慨然閱青簡而思陵雲之氣操朱絃而想流水之  
屬哉厥子曰堅景龍中加金章紫綬行禮部侍郎得以  
命卿之祿奉蠲潔之祀無念烈考樹之家風迺刊石立  
頌將以識徃行攄無窮使本枝百代不忘先人之殞其

名也其詞曰

王言維令中禁是司帝嘉文父曰汝宜之終溫且惠習  
禮明詩長裾傳道大筆修詞鴻業潤色玄黻緝熙昊天  
大戾君子明夷蒼梧啟手涅而不緇中興受命逝者無  
追靈符泗水崇贈先師髣像精魄丕承聖期教近子貴  
榮躋父慈學嗣三業才俱一時春秋孝享霜露深思後  
之視者斯文在茲

大唐中散大夫行淄州司馬鄭府君神道碑

五山可陟惟德也為之崇高萬物皆化惟名也謂之不  
朽若夫行欲蓋而德彰道無求而名立常聞其語今見  
其人公諱某滎陽人也華州刺史襄城公偉之曾孫蒲  
陽太守大濟之孫荊州刺史乾熒之子在昔周王敦叙  
九族邦懿親於鄭維時鄭伯敬敷五教賦善職於周其  
後蕃衍儒門光華士族威行西域名震京師入則天子  
授經出則單于抗禮公揭日月表山川體二氣之清淳  
納百代之層慶越在岐嶷異於常童以既冠帶遊皆長

者初以門子宿衛解褐涼州叅軍轉嘉州司士又宰鍾  
離當陽二縣皆秩滿兼攝江陵期月政不改俗官不易  
方羣盜出奔遠人來附其所處也入境聞愷悌之聲其  
所去也扶路有鬱陶之思非夫忠信以結之法令以齊  
之易簡以業之仁義以肥之孰能順人如此其理者乎  
神皇玉冊受天金壇拜洛頓綱而鶴書下闕門而羣龍  
至公待詔公車召議宣室自以竒士承一顧之恩許其  
正人叅四率之屬乃墨制除太子右清道長史尋加中

散大夫行淄州司馬負士元之才於是拜職遇丘明之疾從茲挂冠洛汭閒居漳濱沉痼優游卒歲福應愆期豈唯朋友之哭將見神仙之吊享年七十有九神龍二年夏六月十五日終洛之私第冬十月一日葬於滎陽之原成先志也公執親之喪三年泣血以聞州里不亦孝乎先人餘業一物不有以讓兄弟不亦悌乎加以賑窮紓急隱德陰施惠人由已反身待物是用氣類益親聲談載路善擊劍好投壺盡五射之妙巧究六書之體

勢此蓋行有餘力則以多能位不充量天之命也有子曰博古曰傳雅曰嘉徵曰嘉慶曰嘉重生極其養沒過乎戚恭惟皇考安宅靈丘盛德備於卑位家風缺乎國史伐石他山寄哀詞客子產遺愛得無叔譽之言公業不忘實有荀攸之歎式撰鴻烈垂之後昆銘曰

大君有命桓公封鄭世執王政其後不競為韓所并以國成姓沉水截河溢為滎波荆山之阿勝氣實多高門  
峩峩衮服委佗猗哉君子世濟其美動如義市居成仁



里鳳集文史猿啼弧矢善政當官惟人所安救危拯越  
勞而不伐大運奄忽芳留形沒高隴既封深泉又重徑  
無人蹤蒼苔歲濃哀哀丘隴墮淚青松

唐故贈齊州司馬陸公神道碑

公諱孝斌字順姓陸河南洛陽人也其先帝媯啟姓陳  
胡立族敬仲之孫有齊國宣王之弟封陸鄉蓋命氏之  
所由興也秦并諸國陸氏分適燕魏文成帝時東平成  
王侯生平原簡王麗重世游美為國之華公即簡王七

世孫也曾祖彥昇北齊以文藝高選任祕書郎以至德表居號終孝里祖玄亮隋鷹揚郎將父淳感盤桓利貞弓招莫進同誌誅行謚為惠康孝悌仁義世不殞矣公誕靈沖和稟識高明簡而中禮易而達節篤學勵行著實飛聲文史者宗其淵府德行者仰其墻仞舉國子明經選絳州參軍始州司法其在官也示人親其親長其長不苛察而小無廢不皎異而大有成知當曰明常澹如也喪親過哀因中風廢卧疾累年不起楚邱肇封大

羅雲逸雖沉痾未弭而僉望先歸授楚王府兵曹叅軍實  
有躬降師賓之禮目擊儀形之訓府罷換趙州錄事叅  
軍以病去職聖厯元年匈奴入趙公危邦不處盡室以  
行望河南而將濟至黎陽而疾甚年六十二月丁未  
終於姚村之逆旅歸殯於滏陽之郭北先天二年皇帝  
踐祚以故吏贈齊州司馬惜哉用公之道行公之志上  
可以序三光下可以平九土存則位不充其德沒則榮  
不逮其身命矣夫夫人范陽郡太君盧氏故岐山丞元瑾

之女恭儉之德備貞信之教興妻道母儀自家刑國享年七十有六開元六年十一月丁未終於洛陽之宣教里八年五月丙子合葬於漳北之神岡禮也初咸亨中王師征遼公叅是軍事友人太原王守義遇疫於海東路艱寇阻兵危勢急公獨顛沛致喪歸其井邑其在安州也朝廷以公精達法理乃命復囚劍南梁岐寬繫動盈千百丹筆所詳十全八九其捨生徇義反已施仁皆此類也禮莫重乎飾終於見其不朽矣善莫大乎餘慶

於知其有後矣四子伯玉仲容叔獻季良泣血銜恤視  
天若墮俾予作頌式昭遺烈銘曰

曠哉陸公覩奧臻妙文雄外炳清明內照從政本仁資  
忠移孝不言而理正身作教才何富之命何負之居喪  
榮毀遭疾棲遲垂彼雲翼落此盛時歿後榮進終延贈  
寵德之休明位匪為重嗟嗟千載賢士之隴

唐故瀛洲河間丞崔君神道碑

蛟龍蟠乎沼無雲雨而不翔君子志於道無運命而不

彰然則變化者是神靈之末富貴者非德行之本守其  
貞樂其分不其至矣世有人焉君諱漪字其博陵安平  
人也在唐為姜姓炎帝之孫也在周為崔氏齊侯之盾  
也遙源長發洪河之水接于天層盤列秀太行之山拒  
於海東觀所以美其文宗北州所以貴其清族魏冀州  
刺史簡公諱纂君之高曾祖也齊散騎常侍諱般君之祖  
也隋大理少卿諱世立君之大父也故祁陽令諱抗君  
之皇考也承百代之隆慶總五德之清淳孝友忠肅宣

慈恭儉好古博雅隣幾亞聖盈而若虛漠而無象非夫  
入周公之廟升孔子之堂則憲章禮樂鮮得其門而覩  
矣弱冠以門胄入國學舉進士母弟汲亦以明經同年  
擢第大理卿張公文瓘人倫之表也目君曰昔兩劉並  
舉以為騁二龍焉今兩崔齊飛可謂儀雙鳳矣搢紳景  
慕憧憧往來徙宅就居投刺成市若衆流之赴壑也及  
親而仕盤桓利貞解褐澤州晉城尉降為光州安樂尉  
換蘄州黃梅尉轉河間丞凡更三尉佐四邑體公綽之

不欲勵伯夷之高操臨事以簡御人以寬雖為小政必有可觀故八使巡風再薦清白河上遺老江濱舊吏吟咏餘聲祖述前事人到于今稱之若夫碧樹烟藹於江潭紅荷藻耀於澤畔寶貝烟花於空浦明玉美潤於斷岸不為珍輿瑶輦之飾前殿後池之玩誠自得焉必將有賞心之所嘆也况乎殿邦光國之寶樽俎柱石之器道為帝者師言為天下利已而稅遠駕於窮轍頓高才於下位亦無惜焉固將有知音之所款也垂拱元年奉



使上都遘疾終於時邕里之旅館享年六十有二夫人  
河東裴氏湖州治中懷儉之孫滁州司馬昉之女也稟  
訓華室作合高門嗣徽先姑克和娣婦德容之盛圖傳  
罕有喪親過哀薨華朝落儀鳳中卒於鄭春秋二十有  
八長安三年春二月合葬於金谷鄉印山之陽禮也北  
據高岡連隴南面大道禁林上國皇州川原指掌仙門  
宰樹碑闕相望玄靈嘉之是安是宅嗣子曰用景龍中  
爵安平縣子職兵部侍郎夙遭閔凶不承誨誘慎終追

遠克家用譽蒙聖主拔竒賞異絕等超倫三顧赤墀之  
下一舉青雲之上祿廩所資吉蠲致美實先人宥十世  
降百祥之所及也永惟官不達者身不登乎明堂行不  
夸者名不書乎史冊則韜光隱德之緒俾後代將何述  
焉夫銘景鐘稱茂代彼大夫之事篆豐石揚令名此孝  
子之志辭曰

維嶽建國厥生炎帝維師尚父諒彼武王古人言曰必  
齊之姜齊之丁公後有崔子因邑命族世濟其美黃鵠

倚歌雕龍擅史倬哉嗣武含章挺生以蒙養正用晦而  
明混之不濁人莫能名學以崇道文以慰志垂其雲翼  
坦然卑位祿逮吾親榮非我仕皇皇上帝建官惟賢有  
人在下胡寧捨旃孰云輔德曾不永年展矣邦媛宜其  
家室友如樂諧皎如月出重壤既兆終天偕畢北陵墳  
丘松楸千秋金碑石樓祇令人愁東都城郭通澗纏洛  
飛橋連閣金管迭作人世之傳然兮山川之宛然兮德  
音之緬然兮

故洛陽尉贈朝散大夫馬府君碑

君諱某字某扶風人也其先伯益贊禹中衍御殿在周  
曰羸姓在晉曰趙上卿以人歸政將軍以馬服為姓緝  
熙乎平通重合焜耀乎伏波中水我高祖汾州刺史諱  
歸歡我大父鷹揚郎將諱仕幹嚴考獲嘉令諱果濟美  
惟舊寘德于君君幼而瓌竒長有規操樂道稽古升堂  
覩與伯父匡武撫之曰亢宗保家吾有望爾悉以先人  
家牒圖傳付之入太學舉明經補巴西尉內憂去職君

四歲而孤重集于蓼因心孺慕名教同傷歸次葭萌江  
溢毀道攀轎號慟濤為之却蜚人哀之胥棧而濟釋服  
調襄陽尉主進魚家絕鱸食州將魯王俾盤二百魚時  
其亡也遺之夫人以辭君還拜受使復王曰非惟是夫  
又亦賢婦吾嘗其一得其二善焉長史盧幼孫悅是獎  
也舉君清幹有聞授清城尉未往且有後命為河西營  
田判官物土穡人藁穀洋羨皇揆其懋考績登焉程務  
挺之軍靈夏也咨君運籌乘遞入幕獲虜數百欲剽罄

之君諫曰王者之師將德是以討叛惟武搗遠在寬搏  
牛之畜不可破蝨未擒伏念何逞纍囚乃止師歸策勲  
上柱國改溫縣尉永淳阻飢廣提中外絕甘分少約已  
周人既喪好逮室無嬖御夫人張氏詹事丞師寂之女  
也敬事皇姑能佐君子娠有胎教宗如樂諧前誌之美  
多所闕載絳郡夫人王氏則天聖后姑之女子而夫人  
之母也嘗曰婦則女訓吾女有焉享年不永玄髮徂落  
時君之伯姊歸宗夫人推居廨寢事之而躬處下室及

亡設几筵於正寢惟明靈以女公之故憑巫通夢屢寢  
為辭舉家懇啟久而後定嘻生則盡禮死而知讓殆其  
神不昧乎溫秩滿轉洛陽尉當周之興也版都社澤郊  
廟粉神嶽僕明堂京穀回環日不暇給又勅君專總徒  
匠凡三百有餘旬蘊勞成疾懷憂損壽永昌元年孟夏  
辛卯卒官春秋五十有七帝用悼之贈朝散大夫旌淑  
紀庸禮焉龜玉在山泉為國寶以其靈與瑞君子居下  
位而上達以其名與義夫是之寵有由也哉葭萌之戚

昭其孝也揚侯息浪異類胥感襄陽之饋熾其潔也德形于家聲聞于外塞垣之讜植其仁也衆俘賴全將不為暴重屋之役底其勤也沒而益榮朝不棄力有一於此猶為令德况備舉乎豈其身將施其後厥子構據擇皆國之良也為有後之其在是乎徵構職太子僕景隆初宰長安永惟考襲朱芾已佩葱珩母氏早逝而榮不及乃讓賜階乞封先妣天子憐之制贈夫人清河縣太君人謂長安能報恩矣詩云欲報之德昊天罔極報恩



之謂也馬氏之墓世在扶風清河之喪也卜宅於洛陽  
邙山麓後君捐館因窆其所夫人穴於兆之甲大夫窆  
於域之庚今龍集戊申將返葬故國君執友禮部侍郎  
嚴善思諗之曰夫子之逝一終八辰精氣其存親壤石  
矣吾嘗相二土從新其愈乎且不戀本達不合葬古神  
尚休無或變有夢先君者與其言叶於是祇率嘉話即  
安成規埋雙墳溝四塹傍建祠宇前勒豐碑茫茫天地  
永懷長畢誰居後之人匪惟是四時蒸薦之事所以觀

百代祖宗之烈其詞曰

昂昂大夫有邈其致洽聞膚敏賙窮錫類孝實迴川清  
能改位佐邑惟五安人則四多稼穰邊昌言扈帥比義  
后稷勤官沒地歔歔天朝毳衣以遂我有合德追啟清  
河宜家族揉主祭神和親戚光貴劍蓋金歌相從先後  
樂此山河

常州刺史平貞眷神道碑

公諱貞眷字密一字間從燕國薊人也蓋晉之公族有韓

國者列於世家韓之餘子食平邑者因為氏姓有漢丞  
相改造繡衣在魏薊侯宅茲玄社故瓜瓞綿於三輔  
枝葉盛乎兩燕魏齊之間世濟其美公即北齊司空公  
鑒之曾孫秘書郎子敬之季孫故偃師令直容之叔子  
鍾積慶之洪肩包太和之粹靈敦龐沉靜直方簡易仁  
義根心政理率性度以禮義文以詩書戶部尚書清河  
崔知悌朝望人倫公之文友深賞延譽遠近宗焉始以  
司成館進士補廬州慎縣尉刺史盧寶胤舉器藏下寮

轉冀州大都督都府

缺

縣尉換晉州洪洞縣主簿北平

陽道昕氣尚標舉河東裴知禮鑒裁精別陽推以孝友  
資身裴亦薦以經邦興化徙雍州新豐縣尉盧少儒引  
為檢點判官差卒選校小大推允休議登聞擢監察御  
史裏行奉使黔中監選有牂牁謝鳳節仁奏罷漢官專任  
首領公上其挾姦樹黨做擾藩落天子悟焉再使置吏  
遠夷駭而旋定雋貫改而復完又駟牧在野攘竊是繁  
耗以歲月莫之禁禦公輅車上隴羣慝畢露表監官斛

斯果之輩奪職者九人沒賊者萬計牧園知禁思無邪  
矣開耀間吐蕃侵境師旅不給乃購運酬勲募耕入選  
利之所聚詐亦居焉公與大理正王守一於河蘭鄯郭  
四州推獲僦糶王希古盧種王誕其徒二千餘人正處  
其罪爰德集作得我直授監察御史內艱去職居喪過毀  
死孝貽憂光宅初肇延兩臺分典百郡服闋授右臺監  
察御史巡察河南澄清郡邑昇賢獎罪能執其中類功  
最加兩階拜右肅政殿中侍御史郎官法天古難其選

固美斯在再拜司勳員外郎永昌中遭凶黨網羅為周

興所奏貶溫州固安令州特舉清白改鴻州櫟陽令邑

多猾人屢宰敗駕公威簡有素誠結無欺一作率是而

行人用不擾獄行自靜狼戾反慤詔書嘉譽加朝散大

夫又羅密徒貝錦為河內所鞠降括州負外司倉尋而事

白進吉州司馬神龍中興官反舊政窮鱗沛而縱壑墜

羽翼而順風拜司門郎中兼衛王司馬無何正除衛王

司馬拜太子左庶子以節愍之禍出為涪州刺史未往

又轉盧州刺史致仕久之景隆中復起左諭德兼榮文館學士詔曰公縉紳者彥操履清淳令譽播於始終嘉績宣於中外儲闈論諭雅望尤高宜申朝典俾加徽服可銀青光祿大夫又攝詹事東都留守拜常州刺史居歲餘優詔致仕享年八十若干先天元年仲冬薨於河南之正平里第遺令近地便葬斂以終服開元二年冬卜葬於伊闕之西夫人河東縣君柳氏祔焉禮也公出入四朝歷官二十其進也皆釋集作能錄勤惟德是與

其退也必含垢受屈在涅不緇子文之量從可知矣凡撰純孝友悌傳各一篇以匡儲后撰先君親友傳十六卷以篤故舊撰家譜誌各十卷以明系本撰河南巡察記十卷以辨風俗非通理博物立誠錫類其孰能見志以著書因事以設誠若斯之盛也有文集十卷行於代初公侍祠清廟有髦士之宜而先考偃師贈蒲州長史自祖考三葉塋無碑記公咨諸通儒而追建銘碣幽趙之士以為美談夫為子則頌德以尊祖飾終以榮親孝



之大也為臣則不枉毫髮以顧私不避豺狼以撓法忠  
之至也潔志則利不涉口欲不萌心清之源也履道則  
不俛眉以悅勢不屈色以苟容正之方也詩曰仲山甫  
舉之公有其德傳曰左丘明恥之公有其直總是四善  
遠齊二賢於是芬苾令問優游眉壽惠風激於勝流丕  
績敷於哲后然以忤彼權貴保茲介特不登三階以正  
四國貞白之似愾焉太息其孤總授充窮泣血靡所真  
懷俾余作頌布哀豐石恭惟先人之寮友常奉長者之

話言公雅珍確實不尚華靡敬慎風規直紀行事業廣  
詞編萬無髣髴少子授八分之妙獨善當時公平日惠  
愛故存之刊刻詞曰

峩峩淑德先生休命履孝蹈忠含清體正如玉之潔如

金之鍊高明徇

疑洵

作

美學以潤之官方正事靜以鎮之

嚴嚴憲府公三峻之赫赫儲宮公三訓之道有行廢時  
有泰否三入三出無愠無喜鼓缶而歌懸車致仕全歸  
葵儉允也君子西山悠悠東川悠悠雲過墳闕風蕩松

楸人亡道存榮往哀留貽世作則行歸於周

張燕公集卷二十

欽定四庫全書

張燕公集卷二十一

唐 張說 撰

碑文

齊黃門侍郎盧思道碑

有齊黃門侍郎范陽盧公諱思道字子行涿人也其先  
姜姓世祚東海別為盧氏家于北燕自漢世中郎植至  
齊侍中陽烏徵君之子稟天靈傑承家令軌清明虛受

磊落標奇言不詭隨行不苟合遊必英俊門無塵雜至  
於求已勵學探道觀奧思若泉涌文若春華精微入虛  
無變化合飛動斯固非學徒竭才仰鑽之所逮也事齊  
歷散騎侍郎以文翰直中書中廢復進至給事黃門侍  
郎待詔文林館武平末天子總兵禦寇太子監國于晉  
陽公留綜宮朝兼典樞密及皇輿敗績於外而百寮蕩  
析於內公節義獨存侍從趣艱告至行賞授儀同三司  
入周除御正上士定省歸郡郡人祖英伯作難公脅在

其旅幽都既平玉石將燎賴元帥宇文公舉以舊有令  
聞引謁因命草露檄立就駭其麗異其敏釋於齊斧之  
下揖於羣士之上除掌教上士隋高祖為丞相也遷武  
陽太守以母老乞解職優詔許之後復徵為散騎侍郎  
奏內史侍郎事隋開皇六年春秋五十有二終於長安  
反葬故里凡更臣三代易官十七再降一免二去職八  
平除擢遷者四而已公處屯安貞賦詩頽飲視得失獲  
如也臨難無懼在黜無愠危不去主任不違親休明有

賓禮之盛顛覆無淪胥之禍其大雅者與夫禮儀損益  
公能言之故與熊安生詳定齊禮三墳五典公能讀之  
故與薛道衡侍學儲后公國華人望光照隣邦故所居  
之朝應對賓客修詞抗議允執其中故青瑣黃纁異代  
咸掌大名之下豈誣也哉昔仲尼之後世載文學魯有  
游夏楚有屈宋漢興有賈馬王揚後漢有班張崔蔡魏  
有曹王徐陳應劉晉有潘陸張左孫郭宋齊有顏謝江  
鮑何劉沈謝徐庾而北齊有溫邢盧薛比皆應世翰林之



秀者也吟咏情性紀述事業潤色王道發揮聖門天下  
之人謂之文伯於戲國有校家有塾祿位以勸風雅猶  
存然千數百年羣心相尚竟稱者若斯之鮮矣才難不  
其然乎然則飛黃虛騁百轡遺路鷓鴣天運萬翼無階  
文士擅名當時垂聲後代亦云才力之絕衆故爾開皇  
以來百三十餘載天贊唐德生此多士公之玄孫曰藏  
用濟美文館重祿黃門永惟衣冠子孫邑里多改先人  
封樹歲代將平迺假詞菲才刊石表隧庶乎涉齊地者

不薪柳惠之隴過邢山者無惑子產之墓至矣乎廬氏之子其用心也遠矣銘曰

或或黃門實天生德才蓋一世榮聞四國文王既沒文在人弘公為宗匠當朝與能龍躍春霄鳳鳴朝升或頌或變或雅或承理以神合聲以妙徵高視睢渙與君代興人之云亡十有一紀斯文未喪施於孫子新作豐碑德音不已

贈吏部尚書蕭公神道碑

仁以度心施物義以由道利貞孝以養志安親慈以教

忠有後舉四行之尤善成百代之餘慶盖得之於蕭府  
君矣公諱灌字立茂蘭陵人帝高辛之苗裔也立烏授  
命教敷五德白雲入房網開三面微子封宋樂叔居蕭  
氏族之始也相國下秦大夫師漢門閥之宗也大齊以  
肅竹膺期踐皇帝之位大梁以木刃興運張天地之圖  
傳寶祚於一家易鴻名於兩漢青盖入洛重南國之衣  
冠白馬朝周盛西雍之賓客公即梁宣皇帝之立孫明  
皇帝之曾孫大父南海王珣入隋封梁國公纂德乾坤

承靈睿哲舊邦雖改見周鼎之時輕新社仍封知晉主  
之必大考鈞中書舍人率更令弘文集賢兩館學士學  
窮秘蹟文標宗匠廣博幽深契神無迹溫良恭儉與道  
為徒是謂啟迪後昆而焜燿前烈者也公總山河之粹  
氣注日月之末光心根孝友器包禮樂動躡思後故口  
無擇言照在機前故身無擇行加以啟蓬山之塞路入  
藏室之玄關四科得游夏之門六藝取鍾王之雋年十  
八明經高第補代王功曹王昇儲改通事舍人又換內

直監曳裾西苑擅文士之場東帶東朝首正人之列外  
艱去職王戎死孝時論憂之閔子免喪哀心未盡乃不  
就祥縞不撤几筵者久之或曰懷其實迷其國行其志  
約其親可乎哉公曰吾過矣不得已而外除不擇官而  
祿仕拜國子監丞以婚姻之故出為甘州司馬徙集嵐  
二州司馬轉渝州長史其從政也反身以惠下推誠以  
敬上老吾老以施教幼吾幼以子人執其心也何往不  
濟故歷佐之邦必僻陋知方戎蠻蠻俗狼戾馴軌貪饕

寡欲迎新者望風而歌來暮送故者計日而戀不足詩云淑人君子正是國人能長人之謂也太夫人在堂有羸老之疾公因使入計得扶持還京下巫峽之波上當陽之坂展轉在側殷憂歷時席不安枕衣不解帶及板輿長稅遂扶杖不起子春視疾加損徒勤石建執喪悲哀自絕永淳元年八月寓居穰縣終於苦蓋春秋五十有七先君之服也三年有終公過時不釋聖善之喪也五十不毀公戀親滅性君子曰禮也夫可謂至矣夫人

京兆韋氏祖雲起兵部尚書父師實秦州都督公卿令  
族蘭杜齊芬鳳凰飛鳴始正家道珠玉秀色終高母儀  
年五十有四長壽元年十月逝於京師布政里粵以二  
年二月辛卯合葬於少陵原之先塋禮也其孤嵩克戴  
聖君以宰天下大福再成於身後湛恩廣運於泉路開  
元十七年仲冬癸丑詔曰中書令嵩父某乙毓粹冲和  
降靈神象言入精微之奧迹登聖賢之軌位不充量道  
足庇人松檟雖幽音徽不昧宜承追遠之慶俾崇冢宰

之榮可贈吏部尚書同日詔曰嵩母韋氏門傳一經行  
包四德才淑冠乎邦族言範光乎母師誕茲寶臣作予  
良弼封其石窀俾承土宇之榮表以金章永賁珩璜之  
飾贈魏郡夫人於是建宗廟修禮物榮君後命告我前  
人遠哉心乎一恩一敬之感會也如是垂裕立訓克家  
揚名遺愛至矣慎終備矣東武公之子孫共連瑩闕南  
城侯之夫人同刻碑銘詞曰

維蕭係宗出宋之子天命齊歷河圖梁紀累帝重王雍



容文史是生邦俊世濟其美仁義孝慈中和庸祇文章  
鳴鳳禮樂元龜碣館枝馬儲聞潘賈人望國華風流儒  
雅歷佐列郡政成休問行立時法言垂後訓歿而益榮  
追位冢卿哀感有情事傳無聲墓門松平碑字金生不  
知千古誰遊九京

贈戶部尚書河東公楊君神道碑

若夫孝在揚名忠歸令德事因感激氣槩生焉時逢屯  
難勲業成焉桃李灼灼不自言於蹊徑松栢青青不受

令於霜雪窮獨善而無撓達兼善而弗矜子曰君子哉  
若人吾斯河東公之謂也公諱執一字某弘農華陰人  
也司空觀王雄之曾孫鄆州弘農公續之孫潞州湖城  
公思止之子戶部尚書相國執柔之弟觀公侍中恭仁  
公之伯父也安德公尚書令師道公之叔父也在隋則  
二代五公在唐則一門三相公台輔積慶稟清明之識  
河岳會靈資磊落之氣體剛毅深於城府蘊規畧長於  
襟帶戲為軍陣敵國之勢幼成請學兵書長城之望早

集年甫十六先君捐館七日絕飲三年泣血縞素有制  
儒家歎其從禮柴棘加等議者憂其死孝清明祖德世  
胄能貧太夫人在堂有致力之養非躬藝黍稷不以供  
甘旨非手樹桑麻不以薦絺纊年逾一紀勤不知勞既  
極安親之心方展事君之節乃濯纓璜渚獻策金門于  
當代之聖君論天下之成敗秦皇覽奏屏左右而與謀  
漢帝聞言膝前席而不覺一見拔玉鈐倉曹再見取尚食  
直長四見寘典設即驟進直詞深觸權嬖為易之兄弟

所嫉授伊川府果毅又上封章帝用嘉納加游擊將軍  
右衛郎將歷清道率換右衛中郎押千騎使總統貔虎  
便繁肘腋故得協心五王戮勦二豎奮飛北洛推戴中  
宗嗣唐配天不失舊物以匡復勲拜雲麾將軍右鷹揚  
將軍封弘農縣公賞未充庸且有後命增冠軍大將軍  
右威衛將軍進河東郡公邑二千戶賦四百室畀之鐵  
券恕其十死又錫天馬瑞錦珠盤瑤爵綵紋五百縑素  
三千分三土之上腴處五等之高列瓊戈紫綬環衛於

鈞陳玉璫黃流侍祠於清廟豈知纓結梁魯政出豔哲  
里克納惠而為戮萇叔城周而見咎彼五績之摧頽此  
三黜之屯躓出為常州刺史以夫人羸老乞避卑濕特  
降中旨轉牧晉州駙馬都尉琅琊王同皎親賢地切休  
戚圖深安劉之策未遂鍾室之災先及吏扇紛獄公陷  
關通貶徙沁州刺史不知事仍長任夜魂九逝非北首  
而無歸晝戶重扃異南冠而同縶果能推分榮辱忘懷  
生死人不堪其憂公不改其操久之盡削官封放懷侍

母梁山雨雪不隔曹氏之思王畿風景未就潘園之養  
尋而大勲不廢天道復反歸既奪之井邑起故時之將  
軍擢衛尉卿尉復初封爵巖巖劍山蜀之險要嗷嗷飛  
雁人未安居饑渴人民輯綏凋弊又授公劍州刺史蔚  
彼黍苗樂我膏澤內憂遠計殞絕逾時於是搏膺星奔  
徒跣永路雨不接夜身不解纒因心過禮朝流欽歎有  
命奪情除汾州刺史知團結兵馬哀訴不允金草無違  
中國簡稽而有備單于逃遁而遠迹詔徵為涼州都督

兼左衛將軍河西諸軍節度督察伯姓赤水軍等大使  
公富以農政和以師律章信蕃部赫怒軍容斷匈奴之  
臂磧路安而不警張漢家之掖雪山開而無寇遂攝御  
史中丞璽書勞徠縟賞稠疊又牧原州未發復授涼州  
都督改右衛將軍使悉如故尋移許州刺史未到以單  
于欵闕授右衛將軍檢校勝州都督兼處置降戶使懷  
柔以德種落宜之徵還本官又兼原州都督屬降戶反  
叛河朔倣擾邊城聳蹙諸將無功強修連率夏州按察

關內羽書日夜俾遷郡牧公按甲待敵確乎不動虜騎畏威竟無來掠向使迴避行於一步則攘竊啟於萬端十將五耗數年未息既而強公追捷朝端延賞徵拜右威衛大將軍進檢校右金吾大將軍尋而即真禁衛肅然異於他日也皇上哀庶戮之不辜念羣胡之自尊大軍之後荆棘生焉乃命公攝御史大夫為朔方元帥公剛腸疾惡擒姦摘罪曩將之所彌縫宿吏之所污沒匿賊散廩一徵百萬矯枉過正衆口噤然改右衛大將軍



無何復右金吾大將軍金刀更新靴仍舊巖廊益峻  
徼道增清改金紫光祿大夫鄜州刺史人寬吏急猶前  
政也享年六十有五開元十四年正月二日薨於官舍  
闔境發喪列城望祭古之遺愛何以加焉天子傷之下  
詔曰故官某夙負名義早著勲庸居內外之職備文武  
之任忠勤匪懈誠節無渝忽焉徂沒情深悲悼可贈戶  
部尚書歸贈成喪有加恒數維公以孝敷聞以忠特達  
以幹述職以能典兵凡領郡十四將軍十二再仗節鉞

三執金吾一至九鄉二兼獨坐儼有直道侃無媚辭銀  
艾復乎舊德珪爵傳乎祚胤全志節於夷險與福祿而  
始終謚曰忠公朝之令典也夫人新城郡夫人獨孤氏  
左威衛大將軍贈益州大都督卿雲之女也婦德母儀  
中外師範開元四載先公即窆以今十五年六月合葬  
於咸陽之洪瀆川禮也其孤濯汪等銜恤靡訴託詞疇  
識感稱代之垂文哀劬勞之罔極銘曰

堂堂揚公神密氣雄苦身難孝正國危忠落彼狡童樹

此帝功昔稱關西今也河東觀王之裔珠華玉麗重葉  
尚主三朝嬪帝鞞鞞七德侁侁六藝公之亢宗鬱為世  
濟涼鎮西隅邦臨北胡天子受鉞將軍剖符青蛇入筭  
白獸銜珠去持玉節來執金吾轉予爪士守於廊時明  
察號神仁恩名子武都石折文昌星死素蓋歸飛黃泉  
已矣卜葬卷阿哀榮孔多尚書鼓吹太守虞歌碑流雨  
迹松引風過獨封茅土長誓山河

故括州刺史贈工部尚書馮公神道碑

金之為寶百鍊而惟精玉之稱德久幽而不昧聖人美  
焉君子比焉可鑠也不可奪其剛可毀也不可污其潔  
偉哉馮公秉斯操矣公諱昭泰字遇聖長樂人也說學  
於古史豈不聞舅氏之厥初乎畢公建德於周畢萬大  
名於魏別封之裔遂氏馮城秦則丞相並時漢則將軍  
重世積仁鍾慶王者鬱興間晉南浮因燕北號家變成  
國為天下雄勲業競五伯之先子孫齊二王之後公即  
昭成皇帝之十世孫也高祖大將軍隨州刺史長山公

謙以寇恂之才翊戴周武魯祖兵部尚書左僕射魏國  
公世基以曹參之力經濟隋文大父尚書左丞檢校御  
史大夫少府監揚州長史安昌公長命以佳吏之名勤  
勞王室考仁高亮無祿子道不究故公幼而襲安昌公  
焉清明激激標格峻堅夏翟耿介無矯飾於韋絃寒松  
清真不受令於霜雪專經覩奧習法精理起家左奉裕  
改讓賢府果毅換文州司馬為酷吏所陷罷官久之調  
榮州長史屬城慢法按而繩之入計會府讎家橫訟明

勅杖其愬者遷公宋州司馬朝廷翕然知有王法復假  
右臺侍御史江南道廉察使類會高等加朝散大夫進  
潞州長史堆岸受湍孤醒見嫉轉湖州長史公東濕不  
回聚蚊交訟貶為饒州司馬未行降使詳復拜鄂州刺  
史制曰卿志氣剛勁操履貞潔歷佐藩條咸有聲稱詰  
姦糾謬不避強禦苦節清威若凌霜雪頃因讒毀遂有  
貶降使者案問皎然明白俾從優獎特加寵命其在江  
夏異政風行入為太子家令兼知內外鑄錢事國泉是

殷盜鎔乃絕河朔淫雨帝思作人俾公檢校邢州刺史  
散有調無人忘歎歲帝乃璽書勞焉其旨曰卿忠於事  
君簡以臨下忘私徇公之美謠謠所載擒姦摘伏之奇  
吏人攸仰雖陳朔之貶黜邪慝王業之斥除貪殘無以  
加也一郡清淨副朕意焉其後以戚累移睦州刺史復  
為羣小所譖左授泉州司馬未之任又貶榮州司馬公  
砥節荒服天高聽卑除温州長史俄復舊階拜括州刺  
史水國瀝洳苦疾言歸景龍三年六月十三日終於蘇

州之逆旅春秋六十有五正人歎息舊莅傷感公清白  
傳家信義高世門有奇士室無長物夫其善於鉤距長  
於衿帶法嚴令峻人寬吏急當官而行不避讒慝之口  
除惡務本不求愷悌之譽出入從宦十有六職以謗獲  
貶者五洗謗特遷者四不曰忠乎將無悔於九死不曰  
直乎焉往而不三黜故人謝而名益著迹遠而風可懷  
也皇上志其持法無撓贈大理卿本其坐樹無言謚之  
曰節窳窳之事一以官供哀榮之禮被於存沒是時天



子嚴謁山陵訓人追孝推恩庶辟瀉澤幽泉公長子少  
府監紹正次子給事中紹烈並構層堂仰延榮贈乃贈  
公工部尚書君子曰孝必錫類忠則不墜臧孫達其有  
後乎鄭公業為不亡矣夫人琅琊君左相邢公及善之  
女垂拱二年三十六而夭後夫人彭城君鴻臚卿善因  
之孫女景龍三年五十有五而逝所謂齊姜昭前邢媛  
輝後碧樹先落悲同孫楚之妻紅蘭漸苞貴在馮勤之  
母以開元十八年十月壬寅葬我節公於長安縣高陽

原夫人王氏劉氏祔焉禮也長子紹正少府監第四子  
紹忠未仕第五子紹烈御史中丞孝乎二連之心思崇  
三絕之美魏王來顧賞幼婦之碑秦師不侵尊死士之  
隴揚名稱代道遠乎哉銘曰

古之志士忠不為難倬哉馮公矯此雲翰噐噐羣小彼  
何足美屢困終直天下改觀輕用百年窮達相半貽慶  
二子雙承天渙嚴嚴大理人命是懸聖朝表贈王道無  
偏六卿冬官百工攸序韓稜雖歿龍泉可許丘陵鼓舞

兮桑改壑遷歲月崩波兮有去不還唯德音與頌兮傳  
不朽於人間

故吏部侍郎元公碑銘崔湜撰序

良玉吐曜非媚荆人之斲幽蘭懷芳豈珍楚客之奏若  
夫克抱厥德不揭其明四海順風以弘道萬乘渴日而  
致用見於元公矣公諱希聲字某河南洛陽人也蓋顓  
頊之裔十三代祖魏昭成帝勲格皇天惠孚庶物駿啟  
靈命大昌於後故我曾大父隋尚書左丞弘尊賢愛人

開物成務我大父隋南郡司法恭禮樂是蹈詩書是好  
我皇考黃州刺史孝節政以仁成名以德舉並代集禮  
以洎於公公含真蘊靈幼有成量承顏善對實覃實討  
母氏鞠育備於典訓三歲便善草隸書客有聞而謬之  
者公援毫立就動有楷則故當時目曰神童焉七歲屬  
文邈有高致十四通五經大旨百家之言先儒未喻一  
覽冰釋四方儒墨之士由是嚮風矣雅合冲漠脱落人  
事鼎鍾黼黻罔滑其志妙於鼓琴尤工幽居綠水之操

常祇傲縱恣不求聞達兄通理以其聲華太高諭其從  
仕不得已舉進士授相州內黃主簿臨下以簡人用宜  
之黃州府君薨決旬不怠暮而不解至性之酷異類同  
傷於是昆弟胥命纍棘互勉負畚荷插躬自成墳故族  
稱元氏之孝服闋調補校書郎轉右金吾兵曹萬年主  
簿公之始至萬年也河洛肇基於天邑峻函分守於懿  
親卽國公武攸望地在維翰寄深鎮撫以公文吏之美  
無為判官凡有牋疏皆自公出朝廷嘉焉徵拜司禮博

士則天大聖皇后萬幾之餘屬想經籍思欲撮羣書之  
要成一家之美廣集文儒以筆以削目為三教珠英蓋  
一千二百卷公首膺嘉命議者榮之書成克厭帝旨遷  
太子文學主客考功二員外賞勤也皇帝纘膺大業擢  
中書舍人是時天地初復中外多務章奏交馳文誥疊  
委公操斧則伐懸衡不欺至於獻納多所施用然而不  
樂處煩屢乞外補上優而不許轉太常少卿無何吏部  
缺公雖虬蟠不進欲固其節而鶴鳴有聞終迫其用乃

拜吏部侍郎實能考才地以諗所立振幽滯以器所用簡而能通清而不介輪栝必舉衆論休之天錫不永清羸邁疾春秋四十有六景龍元年某月終於某天子悼焉賻以粟帛哈襚之事即以景龍元年某月歸葬於某禮也懿交暱友平生詞賦之客聚泣而評曰公事寡嫂撫孤姪以義聞居閨門接昆弟以禮著黃州之酷昭其行也卽國之徵表其才也奉常之舉見其高也吏部之僉彰其用也况乎體道之要心無疵瑕包身之防口絕

臧否非夫全德具美自天離祉曷能臻此君子患道之  
不立不患壽之不永公道行矣奚其多傷而已哉有集  
三十卷行於世嗣子寄童齷之子嬰兒之慕夫人李氏  
故亳州刺史某之女今主客郎中顯之從父妹也華首  
喪天帷堂哭晝貌視呱疚哀感草木託詞於我故人庶  
以紀百代之盛予與公一遇相得二紀同遊睽光粉闥  
接袂華禁容範之好宛猶存目宴謔之言未忘於耳追  
慨疇曩援毫涕集公執交兵部侍郎南陽張說吏部侍



郎范陽盧藏用當代英秀文華冠時而盧兼有臨池之  
妙故張述銘盧篆石天下稱是碑有二美焉詞曰

英英白雲瑞彼君輅佻佻公子嘉我王度魏后遺德作  
華天朝雲氣應變直心遙遙麟閣書仙鳳池墨妙太常  
國禮少宰邦教公之處之有倫有要玉折其貞金斷其  
清歿而不朽仁乎令名

唐贈丹州刺史先府君神道碑

府君諱隲字成隲范陽方城人也張祖曰揮帝軒之胤

肇勲弦木錫姓尚矣詩有卿士孝友史有留侯世家八  
葉至東漢司空皓子宇北平太守始居范陽四葉至西  
晉司空華子躄散騎常侍仍僑江左昆孫太常復歸河  
洛故河東有司空砦洛陽有散騎里後司空至府君十  
二代不失仁義矣王父諱弋周通道館學士考諱恪無  
祿早世府君瑩生遺育四代單緒家世尚儒不及伯魚  
之訓外祖為理遂讀臯陶之書以明法歷饒陽長子二  
尉介休主簿洪洞丞以所願乎下事乎上以所願乎上

交乎下反身與人何往不順臺選貞白覆囚山南人謂  
是行有典刑矣昊天不弔年五十二調露元年十二月  
乙卯捐背於縣解夫人長樂縣太君馮氏父威蓋田丞  
敬脩法度踐涉圖史顧復幼孤將就成立家道不殞夫  
人是賴享年七十二傾背於東都康俗里第光珪說不  
天夙遭閔凶又集荼蓼先王制禮不敢從滅以景龍二  
年七月己亥安葬於萬安山陽祔從周制也先君不祿  
俸不奉親不機杼不資身僚舊無雞黍之接况其非類


乎族姻無魚菽之受况其人吏乎是全其高而善其獨也過四十始閱六籍觀詩得之厚觀書得之恒觀樂得之和觀禮得之別觀春秋得之正觀易得之元曰君子多乎哉事斯一言而已矣每誦道記三復三寶曰至人之心有以垂世又聞之太夫人云吾有子五十載非其疾無一日之憂太夫人亦云吾事夫子三十年且無忤聲目無暴色先君之違世也其憂戀者尊門在殯與聖善在堂與我諸孤無日敢忘及王母終養二祖封崇亦

尚克家成遺訓矣若夫安親孝也宜家義也翼子慈也  
軌迹隱乎含光故當代罕耀馨香發乎潛德故明神終  
勞先大夫久而益榮沒而不朽蓋此景龍二年天子嘉  
侍臣之匪躬念前人之蘊德二月乙巳詔曰故官某毓  
德高邁藏器下僚代載儒雅家傳清白河東佐邑長不  
欺之風山南覆囚溢無寃之聽徂謝永久丘墳不飾啟  
茲令肖貞事先朝宜崇追遠之恩以表揚名之志可贈  
使持節丹州刺史王澤漏乎泉壤國禮崇乎宗廟漢帝

論士恨不見李牧之為人曾子思親泣無逮楚王之厚  
祿道存運往痛矣餘悲緬存前哲之所以聞無聲於四  
海視不見於百代者匪銘頌與桓麟蔡邕其則不遠嗚  
呼霜露交積松檟滋深兄弟永懷相顧將老胡伯虎豈  
敢掩大人之清陳季方何足知家君之德小子銜恤非  
曰能文莫假辭於他者務傳信於我也銘曰

猗嚴考用玄妙體太和竭高志貞夫一戒其多孝於親  
正于家刑于訓清厥心晦厥迹畏厥聞如何其謙儉慈

皇哉褒德永世有詞



張燕公集卷二十一